

## Энг гўзал сўз



21:32 / 20.02.2018 5391

### **Аллоҳга даъват қилган, солиҳ амалларни қилган ва «Албатта, мен мусулмонларданман!» деган кишидан кўра гўзал сўзли ким бор?!**

Дунёдаги энг гўзал сўз Аллоҳ таолонинг йўлига чақиравчи сўздир. Дунёдаги энг гўзал сўзловчи Аллоҳ таолога чақиравчининг ўзиdir. Аммо ўша сўзнинг ҳақиқатда гўзал бўлиши ва ўша сўзловчининг ўзи энг гўзал сўзловчи бўлиши учун қуруқ чорловнинг ўзи етмайди. Балки шу билан бирга, солиҳ амал ҳам бўлиши ҳамда

**«Албатта, мен мусулмонларданман!»** – дейиши керак. Ана ўшандагина у одам энг гўзал сўз сўзлаган бўлади. Зоро, фақат мусулмонлиги туфайли шу фазлга эга бўлгандир.

Демак, ҳар бир мусулмон чорловчи Аллоҳга даъват қилиш ила энг яхши сўзни айтаётгган бўлади ва ўзи энг яхши инсонлар сафига қўшилган бўлади.

Ана ўша сифат ўзида қолиши учун у, аввало, солиҳ амал қилмоғи, бошқача қилиб айтганда, ўзи чақираётган нарсага ҳаммадан аввал ўзи амал қилмоғи лозим.

Иккинчидан, мазкур даъват йўлига кирган одам ўта камтар бўлмоғи лозим. Одамлар унга ҳавас қилсалар, уни гўзал сўз ва гўзал ахлоқ соҳиби сифатида эҳтиром қилсалар, **«Албатта, мен мусулмонларданман!»** –

дэйиши керак. Яъни «Агар менда бирор яхшилик кўрсангиз, бу менинг мусулмон бўлганимдандир», дэйиши лозим. Ана ўшандагина у энг гўзал сўзли киши бўлади.

Шу билан бирга, Аллоҳга чақиравчи билиши ва амал қилиши зарур бўлган бошқа ишлар ҳам бор.

**Яхшилик билан ёмонлик баробар бўлмас. Яхши бўлган нарса ила даф қил. Қарабсанки, сен билан орасида адовати бор кимса худди қадрдон дўстдек бўлур.**

Аллоҳнинг йўлига чақиравчи ўз сўзининг қадрини яхши билиши, сўзни ҳис этиши керак. Чунки

**«Яхшилик билан ёмонлик баробар бўлмас».**

Аллоҳ таолонинг йўлига чақиравчининг иши яхши иш, сўзи яхши сўз, унинг иши бошқаларнинг ишидан устун, унинг сўзи бошқаларнинг сўзидан устун. Шунинг учун ҳам

**«Яхши бўлган нарса ила даф қил».**

Ҳар қанча ёмон гап эшитиб, ҳар қанча ёмон муомала кўрсанг ҳам, фақат яхши нарса ила қайтар, эй Аллоҳнинг йўлига чақиравчи! Ҳеч қачон ёмонлик қилма! Ана ўшанда

**«Қарабсанки, сен билан орасида адовати бор кимса худди қадрдон дўстдек бўлур».**

Бу Исломга чорловчилар учун жуда ҳам зарур бир сифатдир. Ҳар бир нарсани ёмонлик билан эмас, фақат яхшилик билан қарши олиш даражасига етган чорловчигина катта муваффақиятларга эришади. Аммо бу сифатга эришиш осон эмас.

**Унга сабр қилганлардан бошқа ҳеч ким эришмас. Унга улуғ насиба эгаларидан бошқа ҳеч ким эришмас.**

Ҳар қандай ёмон сўзни яхши сўз билан қайтариш, ҳар қандай ёмон ишни яхши иш билан қайтариш сифатига

**«...сабр қилганлардан бошқа ҳеч ким эришмас».**

Сабр қилмаса, ёмон сўзга дарҳол ёмон сўз қайтаради. Ёмон ишга ёмон иш қайтаради. Бу эса Аллоҳнинг йўлига чорловчига ҳеч фойда бермайди.

Кишиларни Аллоҳнинг йўлига, Аллоҳнинг динига чақириш осон иш эмас. Аллоҳнинг динига чорловчи шахс кишиларнинг ҳавои нафсларида, ўрганиб қолган одатларида, уларнинг шахсий манфаат деб ўйлаб юрган баъзи бир нарсаларида қарши гапириши керак. Шунингдек, бундай одам кишиларни ўзлари билмаган эътиқод, ибодат ва амалларни бажаришга чақириши керак. Шунинг учун ҳам Аллоҳнинг йўлига чорловчи одам атрофдан турли-туман маломат, иғво, бўхтон, ёлғон гаплар, сўкишлар, озорлар эшитади. Турли ноҳақ тасарруфлар ва зулмлар кўради. У шуларнинг ҳаммасига сабр қилиши лозим. Ана шундагина юқорида айтилган даражага эришади.

**«Унга улуғ насиба эгаларидан бошқа ҳеч ким эришмас».**

Насибаси улуғ бўлмаганлар эриша олмайди. Демак, Аллоҳнинг йўлига чорловчи бўла олмайди.

Демак, Аллоҳнинг йўлига чорловчи ушбу мashaқатли йўлда турли ҳолатларга учраши мумкин. Бунда эса, албатта, Аллоҳдан ёрдам сўраши керак.

**Шайх Муҳаммад Содик Муҳаммад Юсуф**

(Тафсири ҳилол китобидан)